

## NAQQIUT

Siunnersuut 7. marts 2017-imeersoq taarserlugu.

(Siunnersuummi oqaaseqaatinilu ataasiakkaanik allannguisoqarpoq. Allannguutit siunnersuummut oqaaseqaatinullu naqqiummi ersipput)

### **Uunga siunnersuut: Pisortani Digitalimik Allakkerineq pillugu Inatsisartut inatsisaat nr. xx, xx. xxx. 2017-imeersoq**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

### **Saqqummiussissut**

### **Siullermeerneqarnera**

Naalakkersuisut sinnerlugit matumuuna saqqummiutissavara Pisortani Digitalimik Allakkerineq pillugu Inatsisartut inatsisissaattut siunnersuut.

Siunnersuut Nuna tamakkerlugu digitalinngortitsinermi periusissiaq 2014-2017-imi Sammisaaq 3-p pivirusnngortinneqarnissaanut ilaavoq. Pisortat oqartussaqaarfiisa allakkerisarnermik atuisinnaanerisa inatsisitigut erseqqilluinnartumik tunngavissaqarnissaat siunnersuutikkut qulakkeerneqassaaq. Siunnersuutikkut aamma qulakkeerneqassaaq innuttaasut aamma suliffeqarfiit allakkerisarneq digitaliusoq atorlugu pisortanut nalunaarutiniq allakkianillu nassitsigaangamik oqartussaqaarfimmit tiguneqarneri naatsorsuutigisinnaassagaat.

Allakkerisarneq innuttaasunit, suliffeqarfinit aamma pisortat oqartussaqaarfiinit tamanit pinngitsoorani atorneqartussatut siunnersuutigineqarpoq. Taama periarfissallit tamarmik allagarsiassatik digitalimik tigusassavaat.

Pisussaaitaannginnissamilli periarfissaqarnissap ilanngunneqarnissaa siunnersuummut ilanngunneqarpoq.

Nalunaarusiap ”Innuttaasut IT’lu 2016”-ip takutippaa innuttaasut siunnersuummut tapersersuisut. Inerniliinerit ilagivaat aperineqartut 65 %-iisa pisortat namminnerlu attaveqatigiinnerat elektroniskimik pissasoq kissaatiginerugaat.

Tele-Postip 2017-2020-mut periusissiani ukioq manna januaarimi tamanut saqqummiuppaa. Anguniagaq tassaavoq Kalaallit Nunaanni atuisut 92 %-iisa tunisassiat Nuummi neqeroorutigineqartut assigalugit internetti sukkasooq atulersinnaassagaat, aammalu

innuttaasut internettimik atuisinnaasut amerlisarneqassasut, atuisinnaanermik piuminarsaaneq aamma akit appasinnerusut aqutigalugit.

Siunnersuut manna, innuttaasut elektroniskiusumik attaveqaqatiginninnissamik kajumissuseqarnerisa aamma Tele-Postip internettimik ukiuni aggersuni annertusaaniarnerata tamarmik kattunneranni Kalaallit Nunaat pissanganartumik nutaamik siunissaqartilerpaat.

Taama oqaaseqaateqarlunga siunnersuut Inatsisartunit suliarilluarneqaqqullugu suliassanngortippara.